

**CONVENIO PARA CONCESIÓN DUNHA SUBVENCIÓN DIRECTA ENTRE A AXENCIA GALEGA DE DESENVOLVEMENTO RURAL E O CONCELLO DE RUBIÁ PARA O PROXECTO SENLLEIRO DE ESCAVACIÓN E REPOSICIÓN DUN PEQUENO TREITO DA VIA NOVA NO PARAXE DE A RUFERTA O SEU PASO POLA SERRA DA ENCIÑA DA LASTRA, NA CATEGORÍA "PROMOCIÓN E POSTA EN VALOR DO PATRIMONIO HISTÓRICO DA COMARCA."**

Santiago de Compostela, na data da sinatura electrónica.

## REUNIDOS

Dunha parte, D. José González Vázquez, conselleiro do Medio Rural, en virtude do seu nomeamento polo Decreto 60/2022, do 15 de maio, polo que se nomean os titulares das vicepresidencias e consellerías da Xunta de Galicia (DOG núm. 94, do 16 de maio), na súa condición de presidente da Axencia Galega de Desenvolvemento Rural (en adiante, Axencia), CIF Q1500273F, con domicilio na Barcia, estrada Santiago-Noia, km. 3, 15897, Santiago de Compostela, e no uso das facultades delegadas atribuídas no Acordo do Consello de Dirección da Agader do 21 de xullo de 2021 (DOG núm. 148, do 4 de agosto).

Doutra parte, D. Elías Rodríguez Núñez, na súa condición de alcalde do Concello de Rubiá, segundo o disposto no artigo 61 da Lei 5/1997, da administración local de Galicia, do artigo 21 da Lei 7/1985, do 2 de abril, reguladora das bases do réxime local, e do artigo 24 do Real decreto legislativo 781/1986, do 18 de abril, do texto refundido das disposicións legais vixentes en materia de réxime local.

Ámbalas partes teñen plena capacidade para levar adiante este convenio e,





## EXPOÑEN

**Primeiro.-** Que ambas entidades son conscientes da necesidade de favorecer as condicións do entorno rural para a mellora da calidade de vida da poboación. Poder contar cunha adecuada oferta no ámbito do ocio, do deporte, da cultura, e/ou nos sectores produtivos, así como cunha boa gama de servizos básicos é fundamental para acadar unha mellora das condicións de socialización e interrelación das parroquias rurais de Galicia. Todo isto, dende a premisa principal de garantir a existencia das infraestruturas básicas e de mellorar a estrutura do territorio para poder fixar a poboación do rural galego.

**Segundo.-** Que a Axencia Galega de Desenvolvemento Rural creouse pola disposición adicional sexta da Lei 5/2000, do 28 de decembro, de medidas fiscais e de réxime orzamentario e administrativo (DOG núm. 251, do 29 de decembro).

A dita lei de creación está modificada, entre outras, pola Lei 11/2021, do 14 de maio, de recuperación da terra agraria de Galicia (DOG núm. 94, do 21 de maio), en cuxo artigo 6 configúrase a Axencia Galega de Desenvolvemento Rural como unha axencia pública autonómica, de conformidade coa Lei 16/2010, do 17 de decembro, de organización e funcionamento da Administración xeral e do sector público autonómico de Galicia, coa consideración de medio propio e servizo técnico da Comunidade Autónoma de Galicia, que actúa como instrumento básico na promoción e coordinación do desenvolvemento do territorio rural galego, co obxectivo de mellorar as condicións de vida dos seus habitantes e de evitar o seu despoboamento a través, entre outras, das medidas de recuperación da terra agroforestal de Galicia reguladas na citada Lei 11/2021.

A Axencia Galega de Desenvolvemento Rural está adscrita á Consellería do Medio Rural, ten personalidade xurídica e patrimonio propios, goza de autonomía administrativa e económica e posúe plena capacidade de obrar, tanto no campo do dereito público como no do dereito privado, para o cumprimento dos seus fins e con suxeición á normativa correspondente.

A Axencia Galega de Desenvolvemento Rural quere promover e poñer en valor no ámbito rural galego o patrimonio histórico, a recuperación da terra agraria, a vida social, cultural e educativa, a contorna natural e os produtos agroalimentarios, xa que as actuacións sobre os ditos ámbitos contribúen a mellorar a calidade de vida e a cohesionar a vida social e a estimular o arraigamento da poboación no medio rural, de xeito que fagan deste un lugar máis atractivo, ao ser as ditas actuacións interesantes dende o punto de vista do fortalecemento do orgullo rural, da diversificación económica, da potenciación do interese polo territorio e, polo tanto, do desenvolvemento xeral do territorio.



A Axencia Galega de Desenvolvemento Rural, no marco das súas competencias e dentro das súas accións estratéxicas, ven apoiando, mediante axudas directas a través de convenios, baixo a denominación de "proxectos senlleiros", diversas actuacións por entender que concorren nelas as características de especial relevancia para o desenvolvemento rural que as fan merecedoras de apoio económico.

Coa finalidade de prever, con carácter xeral, os requisitos para a concesión deste tipo de axudas, o 20 de abril de 2022 o Consello de Dirección da Axencia Galega de Desenvolvemento Rural aprobou o Acordo polo que se fixan as regras de tramitación das axudas, mediante concesión directa a través de convenio, do Programa de Proxectos Senlleiros ([https://agader.xunta.gal/sites/w\\_pagade/files/documentacion/acordos/2022\\_04\\_28\\_acordo\\_proxectossenlleiros.pdf](https://agader.xunta.gal/sites/w_pagade/files/documentacion/acordos/2022_04_28_acordo_proxectossenlleiros.pdf)), modificado por acordo do 7 de novembro de 2022 do Consello de Dirección da Axencia Galega de Desenvolvemento Rural polo que se modifica a regra 4ª "Entidades beneficiarias dos proxectos senlleiros" onde se engade como entidade beneficiaria dos proxectos senlleiros as Comunidades de montes veciñais en man común (punto 4.2 do Acordo) ([https://agader.xunta.gal/sites/w\\_pagade/files/documentacion/acordos/2022\\_11\\_7\\_certificadosenlleiros.pdf](https://agader.xunta.gal/sites/w_pagade/files/documentacion/acordos/2022_11_7_certificadosenlleiros.pdf)). As regras deste Acordo conceptúan como proxectos senlleiros as actuacións sobre elementos e realidades merecedores dun recoñecemento especial, pola súa capacidade para contribuír á conservación de dúas finalidades esenciais: Mellorar a calidade de vida da poboación e promover a fixación desta nas áreas rurais.

**Terceiro.-** Nos termos previstos na Lei 7/1985, do 2 de abril, de bases do réxime local, o Concello de Rubiá para a xestión dos seus intereses e no ámbito das súas competencias, promove actividades e prestar os servizos públicos que contribúen a satisfacer as necesidades e aspiracións da comunidade veciña. No ámbito destas competencias, desenvolve todas aquelas funcións que favorezan o desenvolvemento da súa contorna. Por outro lado, o Concello de Rubiá, como entidade máxima da representación do seu territorio debe de ser unha entidade referente na potenciación de actuacións que favorezan ese desenvolvemento.

O 7 de setembro de 2023 o Concello de Rubiá presentou unha solicitude de colaboración á Axencia Galega de Desenvolvemento Rural para o financiamento dun proxecto senlleiro dentro da categoría de "Promoción e posta en valor do patrimonio histórico da comarca". Xunto coa solicitude achegou o proxecto técnico para a escavación e reposición dun pequeno treito da VIA NOVA no paraxe de A Ruferta o seu paso pola Serra da Enciña da Lastra na súa fase III.

O ámbito de actuación do treito da vía romana na que se pretende actuar, sitúase en terreos comunais pertencentes a poboación de O Robledo da Lastra (Rubiá) dentro dos límites do Parque Natural Serra da Enciña da Lastra, nunha franxa aproximado de 25 metros de lonxitude por 12 metros de ancho.



Para a execución deste proxecto arqueolóxico, pola singularidade dos bens sobre os que se quere actuar, as actuacións deben suxeitarse ao disposto na Lei 5/2016, do 4 de maio, do patrimonio cultural de Galicia e o Decreto 199/1997, do 10 de xullo, polo que se regula a actividade arqueolóxica na Comunidade Autónoma de Galicia e polo tanto, ter consecuente autorización preceptiva por parte da Dirección Xeral de Patrimonio Cultural da Xunta de Galicia.

O artigo 96.1 da Lei 5/2016, do 4 de maio, do patrimonio cultural de Galicia establece que: *"Será necesaria a autorización previa da Consellería competente en materia de Patrimonio Cultural para a realización das actividades arqueolóxicas a que se refire o artigo anterior"*.

Para os efectos desta lei, as actividades arqueolóxicas que o Concello de Rubiá quere realizar, encádrase no disposto no artigo 95 c) *"A escavación arqueolóxica, entendida como a remoción de terras, no subsolo ou no medio subacuático, que se realice co fin de descubrir e investigar toda clase de restos históricos ou paleontolóxicos relacionados con estes"* e 95.f) *"Os labores de protección, acondicionamento, conservación, consolidación e restauración arqueolóxica, entendidas como as intervencións en xacementos arqueolóxicos encamiñadas a favorecer a súa conservación e preservación e que, en consecuencia, permitan a súa gozar e acceso público e faciliten a súa comprensión e uso social"*.

O tipo de actuación que propón o concello, vai encamiñada á conservación e revalorización do patrimonio, definida no artigo 2 do Decreto 199/1997, do 10 de xullo, polo que se regula a actividade arqueolóxica na Comunidade Autónoma de Galicia: *"c) Actuacións de conservación e revalorización do patrimonio: son actuacións de conservación e revalorización do patrimonio as que teñen como obxectivo principal promover o rendemento sociocultural, a difusión e o coñecemento público do patrimonio arqueolóxico"*.

A finalidade que se persegue con este proxecto é a escavación e reposición dun pequeno treito da VIA NOVA no paraxe de A Ruferta o seu paso pola Serra da Enciña da Lastra na súa fase III. A intervención proposta vai encamiñada a recuperación dun pequeno treito de 25 metros de longo, da vía romana conservado no paraxe do Parque Natural da Serra da Enciña da Lastra coa finalidade de poñer ó descuberto as súas características construtivas, no que se mostra unha ampla explanada con tallos a pico na rocha, cuneta de evacuación de augas e murete de contención da caixa da vía romana como complemento cultural e social importante dentro das actividades e ofertas do Parque Natural.

De acordo co artigo 26 da Lei 9/2007, do 13 de xuño, de subvencións de Galicia, non é posible promover a concorrencia pública para a realización desta actuación é dada a necesidade de atender áreas específicas como a promoción e posta en valor do patrimonio histórico da comarca. Neste caso o proxecto presentado polo Concello de Rubiá para a escavación e reposición dun pequeno treito da VIA NOVA no paraxe de A Ruferta o seu paso pola Serra da Enciña da Lastra, propón a rehabilitación deste espazo público por ter un marcado significado histórico, social e cultural para a comarca na que se sitúan. Todas estas actuacións redundarán na mellora e as condicións de uso e goce do





mesmo co fin de destinalos a un uso público compatible cos seus elementos así como ofrecer a súa visita como complemento cultural e social importante dentro das actividades e ofertas do Parque Natural.

En consecuencia, o citado proxecto ten cabida no Programa de proxectos senlleiros da Axencia Galega de Desenvolvemento Rural, xa que, conforme ao citado Acordo do 20 de abril de 2022 do seu Consello de Dirección, contribúe a cohesionar a vida social no medio rural e a estimular o arraigamento da poboación sobre o territorio no que habita nel mediante a consecución dos seguintes obxectivos:

- Preservación dos valores sociais e culturais do medio rural.
- Potenciación de elementos que recuperen ou manteñan a historia e a memoria da comarca.
- Mellora da relación social dos veciños.
- Revalorización de infraestruturas e inmobles desaproveitados.
- Satisfacción de necesidades e aspiracións da veciñanza.
- Fortalecemento do orgullo e satisfacción de pertenza á comunidade rural beneficiaria do proxecto.
- Potenciación de elementos que recuperen ou manteñan a historia e a memoria da comarca.

Por outra parte, as actuacións propostas cumpren os requisitos a) previstos para a categoría A) da regra 3 do acordo do 20 de abril de 2022:

A) Promoción e posta en valor do patrimonio histórico da comarca.

- a. Realizar a rehabilitación, reconstrución ou recuperación de edificacións, infraestruturas ou espazos públicos singulares, ou por teren un marcado significado histórico para a comarca na que se sitúan, por pertencer a correntes artísticas recoñecidas, co fin de destinalos a un uso público compatible cos seus elementos e características tradicionais, priorizando o seu uso tradicional.

Ademais, o citado Acordo do 20 de abril de 2022 (modificado neste apartado polo Acordo de 7 de novembro de 2022 do Consello de Dirección da Axencia Galega de Desenvolvemento Rural) sinala como posibles entidades beneficiarias das axudas para os proxectos senlleiros as seguintes entidades públicas ou privadas sen ánimo de lucro que realicen actividades en beneficio da poboación do rural galego: Concellos.

Por último, o Acordo do 20 de abril de 2022 tamén sinala que o ámbito territorial de execución dos proxectos senlleiros será o todo territorio da Comunidade Autónoma de Galicia, agás:

- a. Nas provincias da Coruña e de Pontevedra, as entidades singulares de poboación (unidades de poboación) que superen os 6.000 habitantes.



- b. Nas provincias de Lugo e de Ourense, as entidades singulares de poboación (unidades de poboación) que superen os 10.000 habitantes.
- c. Os termos municipais dos concellos de Vigo e da Coruña, tendo en conta que todo o territorio de ditos concellos ten un alto grao de influencia urbana, derivada da presenza das dúas cidades galegas máis grandes.
- d. Os parques empresariais situados no territorio dos concellos de Ourense, Santiago de Compostela, Lugo, Ferrol e Pontevedra.

Polo exposto, o proxecto presentado polo Concello de Rubiá para a escavación e reposición dun pequeno treito da VIA NOVA no paraxe de A Ruferta o seu paso pola Serra da Enciña da Lastra, dentro da categoría "Promoción e posta en valor do patrimonio histórico da comarca", cumpre cos criterios obxectivos e subxectivos necesarios que xustifican o financiamento desta actuación a través dunha subvención directa e motivan a súa formalización a través deste convenio.

**Cuarto.-** O artigo 19.4 da Lei 9/2007, de subvencións de Galicia, establece que poderán concederse de forma directa subvencións nas que se acrediten razóns de interese público, social, económico ou humanitario ou outras debidamente xustificadas que dificulten a súa convocatoria pública.

Como se pode deducir do manifestado nos apartados anteriores, en cumprimento do establecido nos artigos 19 e 26 da Lei 9/2007, de 13 de xuño, de subvencións de Galicia, e no artigo 40 do Decreto 11/2009, do 8 de xaneiro, polo que se aproba o Regulamento da citada lei, os obxectivos que se perseguen con este convenio resultan de interese público, social e económico para o desenvolvemento rural, a través da categoría de proxecto senlleiro en que se encadra, conforme ao Acordo do 20 de abril de 2022 do Consello de Dirección da Axencia Galega de Desenvolvemento Rural, e están en consonancia coas medidas de impulso e apoio ao desenvolvemento rural levadas a cabo pola axencia.

Ademais, debido ao carácter puntual ou ocasional deste tipo de apoio e á vista das características concretas das actuacións previstas, non parece adecuado articular estas axudas a través dunha convocatoria pública, sendo a subvención directa a través de convenio a fórmula que máis se adapta á natureza destas axudas.

En concreto, en relación ao proxecto de que se trata, as razóns que xustifican o interese social e público que dificultan a promoción da concorrencia pública e a seguinte: a escavación e reposición dun pequeno treito da VIA NOVA no paraxe de A Ruferta o seu paso pola Serra da Enciña da Lastra encadrada na categoría promoción e posta en valor do patrimonio histórico da comarca. Pola ladeira occidental da Serra da Enciña da Lastra consérvase un espectacular pequeno treito orixinal dunha das rutas romanas máis importantes do Noroeste peninsular coñecida, naquelas datas, polos seus construtores como VIA NOVA. A característica destas actuacións de conservación e revalorización deste patrimonio romano teñen como obxectivo principal promover o rendemento sociocultural, a difusión e coñecemento público do patrimonio arqueolóxico o que fai dificulta concorrencia pública para este tipo de proxectos tan singulares.





En consecuencia, as partes, asinan este convenio para a concesión dunha subvención directa, de acordo coas seguintes

## CLÁUSULAS

### **PRIMEIRA.- Obxecto e actuacións**

O obxecto do presente convenio é o financiamento do proxecto presentado polo Concello de Rubiá para a escavación e reposición dun pequeno treito da VIA NOVA no paraxe de A Ruferta o seu paso pola Serra da Enciña encádrase na categoría promoción e posta en valor do patrimonio histórico da comarca dentro do Programa de Proxectos Senlleiros da Axencia Galega de Desenvolvemento Rural.

### **SEGUNDA.- Actuacións a realizar**

As actuacións a realizar son as que se relacionan no proxecto presentada polo Concello de Rubiá que consisten na escavación e reposición dun pequeno treito da VIA NOVA no paraxe de A Ruferta o seu paso pola Serra da Enciña da Lastra nunha fase III.

A intervención proposta vai encamiñada a recuperación dun pequeno treito, 25 metros de longo, da vía romana conservado no paraxe do Parque Natural da Serra da Enciña da Lastra coa finalidade de poñer ó descuberto as súas características construtivas, no que se mostra unha ampla explanada con tallos a pico na rocha, cuneta de evacuación de augas e murete de contención da caixa da vía romana como complemento cultural e social importante dentro das actividades e ofertas do Parque Natural, continuando coas labores do ano 2018.

Para elo, procederase a escavación arqueolóxica por unha parte do lenzo de muro de contención levantado a base de laxas de lousa colocadas en seco que definen unha plataforma de grandes dimensións que acadan os 11 metros de anchura non observados noutros pequeno treitos desta mesma vía o mesmo tempo que se pretende descubrir a cuneta de evacuación de augas localizada na parte de arriba da explanada por debaixo dos grandes tallos detectados na zona.

Unha vez executada a escavación arqueolóxica procederase a reposición do murete de contención nas zonas onde este se atope deteriorado empregando nestes traballos o material recuperado na escavación fundamentalmente lousas procedentes dos derrubes orixinados polo paso do tempo e a acción desafortunada de máquinas retroescavadoras que afectaron a plataforma da vía romana con motivo dos incendios forestais acontecidos xa fai algúns anos e se esta non fora suficiente recorreríase a outra procedente doutros lugares con características semellantes as utilizadas en orixe.





Segundo dispón o proxecto, os traballos a executar organízanse en varias fases:

1. En primeiro lugar realizarase unha limpeza xeral do manto vexetal, se fose preciso, da zona da traza da vía romana no paraxe coñecido como A Ruferta. Dita limpeza do manto vexetal executarase de xeito manual despexando da maleza e mato toda a superficie da plataforma da vía romana nunha superficie de 25 metros de longo por 12 metros de ancho.
2. Unha vez realizada a limpeza vexetal procederase a escavación arqueolóxica do murete de contención da explanada da vía romana así como da cuneta de evacuacións de auga procedentes da ladeira da montaña, nunha franxa de 25 metros de longo.
3. Reposición do murete de contención nas zonas onde fose necesario, aproveitando as lousas procedentes da escavación arqueolóxica que serán colocadas en seco coas finalidade de apreciar as características construtivas da vía romana e si esta non resultara suficiente recorreremos a outra procedente de fora coas mesmas ou similares semellanzas .

Ao abeiro do presente convenio considéranse actuacións subvencionables as actividades, investimentos e gastos realizados polo beneficiario que se encadren nos conceptos que se detallan no Anexo I "Orzamento xeral e desglose actuacións por anualidades" deste convenio e cumpran as condicións que se definen no proxecto presentado.

### **TERCEIRA.- Obrigas do Concello de Rubiá**

O Concello de Rubiá comprométese a facer constar en toda a publicidade -tanto impresa como audiovisual- a colaboración da Axencia e a Xunta de Galicia, para o que utilizará a normativa da imaxe corporativa da propia da Axencia. Así mesmo comprométese ao cumprimento das obrigas contidas na Lei 9/2007, do 13 de xuño, de subvencións de Galicia e en especial as recollidas no artigo 11 desta norma. Tamén será de aplicación o establecido no Decreto 11/2009, do 8 de xaneiro, polo que se aproba o Regulamento da Lei 9/1997, en canto non se opoña á lexislación anterior. Con carácter supletorio, será de aplicación o disposto na Lei 38/2003, xeral de subvencións, e no seu regulamento, aprobado polo Real Decreto 887/2006, do 21 de xullo.

Os beneficiarios deberán dar cumprimento as obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

O beneficiario ten a obriga de prestar colaboración e facilitar canta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma, ao Tribunal de Contas e ao Consello de Contas.



Segundo o establecido no artigo 4 do Decreto 193/2011, polo que se regulan especialidades nas subvencións ás entidades locais galegas, é necesario que o Concello de Rubiá cumpra co deber de remisión ao Consello de Contas das contas xerais de cada exercicio

O Concello de Rubiá deberá presentar declaración responsable, para proceder á sinatura do convenio e despois para o seu pagamento, de estar ao día no cumprimento das obrigas tributarias e fronte á seguridade social e de non ter pendente de pagamento ningunha outra débeda coa administración pública da comunidade autónoma, segundo o establecido no artigo 10 da Lei 9/2007, de subvencións de Galicia, e no artigo 11 do Decreto 11/2009, polo que se aproba o regulamento da citada lei.

A sinatura deste convenio implica, de ser o caso, a autorización a Axencia para solicitar as certificacións acreditativas de que se atopa ao corrente das obrigas tributarias estatais e autonómica e da seguridade social, así como que non ten pendente de pagamento ningunha outra débeda, por ningún concepto coa Administración pública da Comunidade Autónoma de Galicia, de acordo co establecido na Lei Orgánica 3/2018, de 5 de decembro, de protección de datos persoais e garantía dos dereitos dixitais, disposición adicional cuarta da Lei 40/1998, de 9 de decembro, do imposto sobre a renda das persoas físicas e outras normas tributarias, e demais disposicións de aplicación.

O Concello de Rubiá comprométese a destinar os fondos percibidos ao obxecto concreto para o que foron concedidos, polo menos durante un período mínimo de 5 anos sempre e cando se trate de bens inventariables. A Axencia poderá comprobar, cando o considere pertinente, a execución das actividades obxecto deste convenio.

#### **CUARTA.- Financiamento**

O gasto total das actuacións do proxecto para a escavación e reposición dun pequeno treito da VIA NOVA no paraxe de A Ruferta o seu paso pola Serra da Enciña da Lastra, a desenvolver polo beneficiario no marco deste convenio, de acordo co orzamento previsto no proxecto, ascende a corenta mil trinta e cinco euros con vinte e sete céntimos (40.035,27 €), para o período 2023-2024

Para o desenvolvemento desas actuacións, a Axencia Galega de Desenvolvemento Rural concede ao Concello de Rubiá unha subvención directa a fondo perdido por un importe de 40.035,27 euros, para as anualidades 2023-2024.

A achega da Axencia Galega de Desenvolvemento Rural realizarase con cargo á aplicación orzamentaria que se indica a continuación, dos presupostos da Comunidade Autónoma de Galicia para os anos 2023-2024, a través dos mecanismos previstos no ordenamento xurídico, que inclúen o cumprimento por parte do beneficiario dos requisitos legais para ser beneficiario.





Aplicación orzamentaria 14.A1.712A.760.0 dos orzamentos xerais da Comunidade Autónoma de Galicia para os anos 2023-2024, código de proxecto 2017-00003.-"Actuacións senlleiras de mellora do patrimonio rural".			TOTAL
Importe	2023	2024	40.035,27 €
	1.637,13 €	38.398,14 €	

Os importes da subvención serán aboados trala presentación da documentación xustificativa da realización das actuacións financiadas (presentada no prazo e coas condicións indicadas na cláusula correspondente do presente convenio) e da emisión do correspondente informe técnico favorable por parte da Axencia Galega de Desenvolvemento Rural, que poderá recorrer, se o considera necesario, a o apoio de expertos externos.

Nos importes indicados entenderase incluído o IVE, sempre e cando este supoña un custo real soportado polo beneficiario, podendo ser considerado gasto subvencionable. Neste caso deberá presentarse un certificado relativo á situación do beneficiario respecto o IVE.

A achega conveniada trátase dun importe certo, quedando por conta do beneficiario a diferenza de financiamento necesario para a total execución da actividade subvencionada, debendo ser reintegrado o financiamento público unicamente no caso e polo importe que supere o custo total e real da actividade, segundo o establecido no artigo 21.2 do Regulamento de subvencións de Galicia.

En aplicación do Decreto 193/2011, do 6 de outubro, pola que se regulan especialidades nas subvencións ás entidades locais galegas, a Axencia Galega de Desenvolvemento Rural poderá efectuar pagos anticipados, que suporán a entrega de fondos con carácter previo á xustificación, ata un importe máximo do 50% da cantidade total subvencionada. Este anticipo non poderá superar o importe previsto para cada anualidade. A concesión do anticipo farase mediante resolución motivada.

O pagamento restante realizarase no momento da completa xustificación polo Concello de Rubiá do cumprimento da finalidade e demais condicións establecidas no convenio.

O Concello de Rubiá tamén poderá solicitar pagos á conta, conforme ao artigo 62 do Regulamento da Lei de subvencións, que responderán ao ritmo de execución das actividades subvencionadas aboándose pola contía equivalente á xustificación presentada.





O importe conxunto dos pagos á conta e dos pagos anticipados que se concedan non poderá exceder do 80% da cantidade subvencionada, ou sexa, 32.028,21 €.

O artigo 65.1 do Decreto 11/2009, polo que se aproba o Regulamento da Lei 9/2007, do 13 de xuño, de subvencións de Galicia establece que os beneficiarios están obrigados á constitución de garantías cando estea prevista a posibilidade de realizar pagamentos á conta ou anticipados; non obstante, segundo o apartado 4 do devandito artigo, exonera de constitución de garantía, entre outros, as administracións públicas.

No caso de que o Concello de Rubiá solicite pagamentos anticipados deberá presentar unha memoria xustificativa e económica na que se recollan as actuacións que ten previsto realizar co custo das actividades.

#### **QUINTA.- Xustificación dos gastos**

O beneficiario xustificará ante a Axencia Galega de Desenvolvemento Rural a realización das actuacións previstas no proxecto que inclúe a memoria técnica valorada ascende a corenta mil trinta e cinco euros con vinte e sete céntimos (40.035,27 €) para as anualidades 2023-2024.

A xustificación do cumprimento das condicións impostas e do seu custo deberá levarse a cabo de acordo co previsto nos artigos 28 e seguintes da Lei 9/2007, do 13 de xuño, e de acordo co previsto no Decreto 193/2011, do 6 de outubro, polo que se regulan especialidades en subvencións ás entidades locais galegas.

De conformidade co previsto na Lei 9/2007, de subvencións de Galicia o prazo de execución e xustificación rematará o 15.11.2024. Para os gastos correspondentes á anualidade 2023, o prazo de execución e xustificación rematará o 30.11.2023 sen prexuízo de que as actividades subvencionadas sexan as executadas a partires do 01 de xaneiro de 2023. Para os gastos realizados comprendidos dende o 01.12.2023 o prazo de xustificación rematará o 15.11.2024.

Se, transcorrido o prazo establecido para a xustificación da subvención, o beneficiario non presenta a documentación pertinente segundo o indicado no presente convenio, a Axencia Galega de Desenvolvemento Rural requirirá conforme ao artigo 45.2 do Regulamento da Lei de subvencións de Galicia, para que no prazo improrrogable de dez días a presente.

A falta de presentación da xustificación nos prazos establecidos nesta cláusula comportará a perda do dereito ao cobramento total ou parcial da subvención, a esixencia de reintegro e demais responsabilidades establecidas na Lei de subvencións de Galicia. A presentación da xustificación no prazo adicional establecido non eximirá ao beneficiario das sancións que, conforme á lei, correspondan.





A conta xustificativa da subvención presentarase electronicamente na Carpeta do cidadán da   persoa solicitante/representante;

<https://sede.xunta.es/carpeta-do-cidadao> e incluíra a seguinte documentación:

- Certificación expedida pola Secretaría da entidade co visto e prace da Alcaldía, relativa á aprobación polo órgano competente da conta xustificativa da subvención, na que se faga constar de forma detallada:
  - a) O cumprimento da finalidade da subvención.
  - b) Os distintos conceptos e contías correspondentes aos gastos totais soportados pola entidade beneficiaria imputables á actuación subvencionada coa seguintes relación: identificación do/a acredor/a, número de factura ou documento equivalente, importe, data de emisión e data de recoñecemento da obriga polo órgano competente.
- Certificación da intervención ou do órgano que teña atribuídas as facultades de control da toma de razón en contabilidade e do cumprimento da finalidade para a que foi concedida
- Facturas expedidas polas empresas adxudicatarias dos traballos relacionados co obxecto deste convenio achegando xunto coas mesmas o comprobante de pago efectuado e certificacións ou calquera outro documento con validez xurídica que permita a acreditación do cumprimento da finalidade da subvención.
- Declaración que conteña unha relación detallada doutras subvenciones, axudas, ingresos o recursos que financien as actividades subvencionadas, así como a modificación das circunstancias que fundamentaran a concesión da subvención.
- Permisos, licenzas e autorizacións que resulten preceptivos segundo a lexislación vixente.
- Certificación ou informe da persoa titular da Secretaría ou da Intervención da entidade local ou, de ser o caso, do/da empregado/a público/a que, de acordo coa estrutura organizativa do concello, teña atribuída as competencias en materia de contratación pública, acreditativo de que o procedemento de contratación se tramitou nos termos previstos na normativa de contratación do sector público, e con indicación do procedemento seguido para a contratación das obras subvencionadas.
- Acta de recepción.
- Aclaracións ou informes relativos á xustificación do investimento que o órgano xestor considere convenientes.

A presentación desta información é requisito imprescindible para a tramitación do pagamento, devolvendo toda a xustificación que non o cumpra.

En todo o relativo aos gastos subvencionables deberá cumprirse o disposto no artigo 29 da Lei 9/2007, de 13 de xuño, de subvencións de Galicia (modificado pola Lei 12/2011, do 26 de decembro, de medidas fiscais e administrativas).

No caso de que a entidade concerte con terceiros a execución total ou parcial da actividade obxecto do convenio, estarase ao disposto no artigo 27 da Lei 9/2007, do 13 de xuño, de subvencións de Galicia, e na Lei 9/2017, do 8 de novembro, de contratos do sector público.





No caso de que o Concello de Rubiá non xustifique ou a xustificación sexa insuficiente, procederá o reintegro das cantidades percibidas e a esixencia do xuro de demora correspondente dende o momento do pagamento de subvencións ata a data na que se acorde a procedencia do reintegro.

Cando a actividade fose financiada ademais de con esta subvención con fondos propios ou con outras subvencións ou recursos, deberá acreditarse na xustificación o importe, a procedencia e a aplicación de tales fondos ás actividades subvencionadas. O importe das subvencións en ningún caso poderá ser de tal contía que illadamente ou en concorrencia con outras subvencións, ingresos ou recursos, supere o custo da actividade subvencionada. En caso de superar procederá o reintegro do exceso obtivo sobre o custo da actividade subvencionada así como a esixencia do xuro de demora correspondente.

#### **SEXTA.- Compromiso de participación das mulleres.**

Mediante o presente convenio as partes asinantes asumen un compromiso de fomento da participación das mulleres tanto no seu ámbito de actuación como nos seus órganos de decisión.

#### **SÉTIMA.- Causas de resolución**

O incumprimento de calquera das cláusulas deste convenio constituirá causa suficiente para a súa rescisión, e así mesmo procederase o reintegro da subvención cando conorra algunha das causas previstas no artigo 33 da Lei 9/2007, de 13 de xuño, de subvencións de Galicia.

#### **OITAVA.- Publicidade**

As partes asinantes deberán cumprir coas obrigas derivadas da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno Aberto da Xunta de Galicia incluíndo os datos identificatevos das persoas asinantes.

Así mesmo, o Concello de Rubiá acepta e consinte a remisión do convenio, logo da súa sinatura, ao Rexistro de Convenios da Xunta de Galicia.

De acordo co establecido no artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa, que introduciu diversas modificacións na Lei 38/2003, do 17 de novembro, xeral de subvencións, o contido deste convenio será publicado na Base de Datos Nacional de Subvencións, nos termos recollidos no artigo 20 da Lei 38/2003, do 17 de novembro, xeral





de subvencións, modificado polo artigo 30 da Lei estatal 15/2014, do 16 de setembro, de racionalización do sector público, e outras medidas de reforma administrativa.

Así mesmo, será obxecto de publicidade no Rexistro de Axudas, Subvencións e Convenios, ao abeiro do disposto no Decreto 126/2006, do 20 de xullo, e no Decreto 132/2006, do 27 de xullo.

#### **NOVENA.- Xurisdición**

En todo o non previsto no presente convenio será de aplicación a Lei 9/2007, do 13 de xuño, de subvencións de Galicia, e a súa normativa de desenvolvemento. Aplicarase con carácter supletorio a Lei 38/2003, do 17 de novembro, xeral de subvencións.

Será de aplicación a Lei 40/2015, do 1 de outubro, de réxime xurídico do sector público.

Este convenio ten natureza administrativa. A xurisdición contencioso-administrativa será a competente para o coñecemento de posibles cuestións litixiosas que poidan suscitarse como consecuencia del.

#### **DÉCIMA.- Vixencia**

O período de vixencia deste convenio será dende a súa sinatura e ata o 30 de novembro de 2024, sen prexuízo de que as actividades subvencionadas sexan as executadas a partir do 01 de xaneiro de 2023.

#### **DÉCIMO PRIMEIRA.- Comisión de seguimento**

Para o seguimento do convenio e da súa execución así como para propoñer solucións aos conflitos que poidan xurdir na aplicación e interpretación das cláusulas do convenio constituirase unha comisión de seguimento que estará integrada por un representante designado polo Concello de Rubiá e un representante designado pola Axencia Galega de Desenvolvemento Rural.

#### **DÉCIMO SEGUNDA.- Notificación electrónica**

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.





As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica).

Así mesmo, o interesado pode autorizar a calquera outra persoa a acceder ao contido das súas notificacións.

Este convenio obriga ás partes que o asinan ao seu cumprimento, e ambas as dúas sométense ao acordado en tódalas estipulacións.

E en proba de conformidade, asínase o presente convenio no lugar e data arriba indicados.

José González Vázquez  
(P.D. Acordo do Consello de  
Dirección do 21.07.2021)  
Presidente da Axencia Galega de  
Desenvolvemento Rural

Elías Rodríguez Núñez  
Alcalde do Concello de Rubiá





## ANEXO I

- Orzamento xeral:

CAPÍTULO	ACTIVIDADE	ORZAMENTO
1,01	<b>Escavación arqueolóxica:</b> Escavación arqueolóxica manual poñendo ó descuberto o murete de contención pola parte de abaixo e a cuneta pola de arriba. Franxa de 25 metros de lonxitude por 12 metros de anchura tomando sempre como referencia o eixe ou centro da explanada da vía romana e levantamento topográfico.	5.500,00 €
1,02	<b>Reposición murete de contención, man de obra:</b> Nas zonas onde o murete se atope deteriorado repoñerase con lousas de lousas asentadas en seco	6.500,00 €
1,03	<b>Adquisición lousas de pedra:</b> Adquisición lousas de pedra procedentes de canteira para a reposición do murete de contención.	8.250,00 €
1,04	<b>Retirada a vertedoiro das terras sobrantas da escavación arqueolóxica:</b> As terras sobrantas da escavación arqueolóxica serán retiradas a escombreira mediante medios mecánicos.	1.900,00 €
1,05	<b>Seguimento arqueolóxico, informes e memoria:</b> Seguimento arqueolóxico, informes e memoria por parte de técnico competente segundo <i>Decreto 199/1997, do 10 de xullo, polo que se regula a actividade arqueolóxica na Comunidade Autónoma de Galicia.</i>	3.500,00 €
1,06	<b>Seguridade:</b> Medidas de seguridade á adoptar na obra, formadas por: Conxunto de proteccións persoais incluíndo cascos de seguridade, pantallas, gafas, mascarillas, protectores para ruído, cinturóns de seguridade, monos de traballo, impermeables, botas, lubas, e demais elementos de seguridade persoal, etc.	1.250,00 €
<b>Orzamento de execución material</b>		26.900,00 €
17,00 % Gastos xerais		4.573,00 €
6,00 % Beneficio industrial		1.614,00 €
<b>Orzamento base contrata</b>		33.087,00 €
21% I.V.E		6.948,27 €
<b>Orzamento total</b>		<b>40.035,27 €</b>



- Desglose actuacións por anualidades:

✓ Anualidade 2023: **1.637,13 €**

✓ Anualidade 2024: **38.398,14 €**

ANUALIDADE 2023	ACTIVIDADE	ORZAMENTO
	<b>1,01 Escavación arqueolóxica: 0,20 unidades</b>	1.100,00 €
	<b>P.E.M sen IVE</b>	1.100,00 €
	17,00 % Gastos xerais de empresa	187,00 €
	6,00 % Beneficio industrial	66,00 €
	<b>Orzamento base contrata.</b>	1.353,00 €
	21% I.V.E	284,13 €
	<b>Orzamento total</b>	<b>1.637,13 €</b>

ANUALIDADE 2024	ACTIVIDADE	ORZAMENTO
	<b>1,01 Escavación arqueolóxica: 0,80 unidades</b>	4.400,00 €
	<b>1,02 Reposición murete de contención, man de obra: 1,00 unidades</b>	6.500,00 €
	<b>1,03 Adquisición lousas de pedra: 1,00 unidades</b>	8.250,00 €
	<b>1,04 Retirada a vertedoiro das terras sobrantas da escavación arqueolóxica: 1,00 unidades</b>	1.900,00 €
	<b>1,05 Seguimento arqueolóxico, informes e memoria: 1,00 unidades</b>	3.500,00 €
	<b>1,06 Seguridade: 1,00 unidades</b>	1.250,00 €
	<b>P.E.M sen IVE</b>	25.800,00 €
	17,00 % Gastos xerais de empresa	4.386,00 €
	6,00 % Beneficio industrial	1.548,00 €
	<b>Orzamento base contrata.</b>	31.734,00 €
	21% I.V.E	6.664,14 €
	<b>Orzamento total</b>	<b>38.398,14 €</b>

